

# तिमोथीयात पावलं चवःगु निगूगु पौ

## म्हसीका

पावलं थ्व निगूगु पौ तिमोथीयात थः ल्याय्म्हम्ह पासा व थःत ग्वाहालि याइम्ह मनूया कथं चवःगु दु। उबलय् तिमोथी एफिससय् च्वंम्ह मण्डलीयाम्ह छम्ह मू नायः खः। पौया मूर्खं सह यायेगु खः। पावलं तिमोथीयात साहस बियाः न्ह्यार्थेज्याःगु दुःखकष्ट व विरोध जूसां येसू ख्रीष्टयागु साक्षी बीगु, धात्थेगु भिंगु खँ व पुलांगु नियम मानय् यानाः स्यनेकने यायेगु सल्लाह बियातःगु दु। थ्व पतिइ तिमोथीयात फयां फतले याकनं रोमय् वयेत इनाप याना तःगु दु। पावलं तिमोथीयात ल्वापु जक पिहां वइगु म्वाःमदुगु जवाःसवाः याना जुइपिनाप बुला जुइ मते धकाः नं ख्याचवः बियातःगु दु। च्वय्च्वंगु खँत फुककं पावलं थःत हे जूगु खँया दसु बियाः तिमोथीयात लुमंके ब्यूगु खः। न्हूगु नियमय् दुगु पावलया पौत मध्ये थ्व पौ दकलय् लिपा चवःगु खः। उबलय् पावल रोमया जेलय् थःत मृत्यु दण्ड बीगु ई पिवाः च्वंगु खः।

थ्व पौ पावलं ईस्वी सम्बत ६४-६५ सालय् चवःगु खः।

## धलः पौ

न्ह्यार्खं .....	१:१-२
प्रार्थना व अर्ती .....	१:३-२:१३
सल्लाह व ख्याचवः .....	२:१४-४:५
पावलयात थःत जूगु खँ .....	४:६-१८
क्वचाय्कूगु .....	४:१९-२२

## २ तिमोथी

### पावलपाखें ज्वजलपा

१ ख्रीष्ट येशूयात विश्वास याक्व-  
सित जीवन बी धकाः धयादी-  
गुलिं परमेश्वरं वय्कःयाम्ह प्रेरित  
यानादीम्ह पावल पाखें २ जि  
यःम्ह काय् तिमोथीयात<sup>१</sup> थ्व पौ  
चवयाचवना। भी परमेश्वर बाः व प्रभु  
ख्रीष्ट येशू छन्त दया माया यानाः  
शान्ति बियादीमा।\*

### सुभाय् व साहस

३ जि जिमि तापाःबाज्यापिन्सं थें  
दुनुगलंनिसें परमेश्वरयागु ज्या याना-  
चवनागु दु। प्रार्थना यायेबल्य् जिं  
छन्त लुमंकाः चान्हिं परमेश्वरयात  
सुभाय् बियाचवनागु दु। ४ छंगु मिखाय्  
जाया वःगु ख्वबि लुमंकाः जि छन्त  
नापलाः वये मास्ति वडगु। छन्त नाप  
लाये खंसा जिगु मन चवनी।

५ छं यचुगु नुगलं विश्वास याःगु  
जि अज्जं लुमनि। छिमि बजे लोइस  
व मां युनिसं नं अथे हे यचुगु नुगलं

विश्वास याःगु खः। छं अज्ज नं  
उकथं हे यचुगु नुगलं विश्वास याना-  
चवंगु दइ धकाः जितः विश्वास दु।\*  
६ अय्जूगुलिं जिं छन्त हानं लुमंका  
चवना — जिं छंगु छेनय् ल्हाः  
तयाबल्य् परमेश्वरं बियादीगु  
वरदानयात छं बांलाक छचला  
चवें। ७ परमेश्वरं भीत भयया आत्मा  
मखु, बरु भीत शक्ति, माया व थःत  
कःघाये फडगु आत्मा बियादीगु दु।

८ उकिं भी प्रभुयागु भिंगु खँ न्यंका  
जुइत लज्या चाये मते, अले जितः  
कुनातःगुलिइ नं लज्या चाये मते, बरु  
परमेश्वरयागु शक्तिइ भरोसा तयाः छं  
नं जिं थें तुं भिंगु खँयागु नितिं दुःख  
सिया जु। ९ थ्व हे परमेश्वरं भीत  
बचय् यानाः वय्कःया मनूत यायेत  
सःतादिल। भीसं यानागु धर्मकर्म  
यानाः मखु, बरु वय्कलं हे दया  
माया यानाः भीत बचय् याना-  
दीगु खः। सृष्टि जुइ न्ह्यः हे ख्रीष्ट  
येशू भीत थ्व दया माया बियादीगु  
खः।

१० भीत मुक्ति बियादीम्ह ख्रीष्ट येशू भायादी धुंकाः तिनि थ्व बांलाक सी दत। वय्कलं मृत्युयात त्याकाः भिंगु खँ न्यंक्वसित अनन्त जीवन बियादिल। ११ थ्व हे भिंगु खँ न्यंकेत व स्यनेत जितः प्रेरित दय्कादीगु खः।\*

१२ थ्व हे ज्यायागु निंतिं जिं थथे दुःख सिया च्वनागु खः। थ्व ज्या यानाः जिं लज्या मचाया छाय्धाःसा जिं सुयात विश्वास यानाच्वनागु दु व बांलाक स्यू। अले प्रभुयात जिं लः ल्हाना बियागु फुक्क वय्कलं हानं लिहां भाया मदितले बांलाक बचय् याना तयादी।

१३ ख्रीष्ट येशू भीत क्यनादीगु विश्वास व माया थें छं नं जिं धयागु फुक्क खँ याना क्यँ। १४ भीगु दुने च्वनादीम्ह पवित्र आत्मायागु ग्वाहालिं छन्त लः ल्हाना बियातःगु सत्य खँयात बांलाक नुगलय् तया ति।

१५ एशियाय् च्वंपिं फुक्कसिनं जितः त्वःता वन धकाः ला छं सि हे स्यू। फुगेलस व हेर्मोगेनसं तकं जितः त्वःता वन।

१६ ओनेसिफरसया जहानपिन्त परमेश्वरं दया यानादी मा, छाय्धाःसा वं जितः यक्व यक्व हे साहस ब्यूगु दु।

जितः भ्यालखानाय् कुना तल धकाः व लज्या मचाः। १७ रोमय् नं वं जितः मात्तुमालाः लुइकल। १८ एफिससय् दुबलय् नं वं जितः गुलि ग्वाहालि यात धयागु खँ ला छं नं बांलाक हे स्यू। प्रभु भायादीबलय् वयात दया माया यानादी मा।

### भिंगु ज्या याइम्ह जुयाः क्यँ

२ १ अय्जूगुलिं जि यःम्ह काय्, ख्रीष्ट येशू बियादीगु दया मायां बल्लाका च्वँ। २ यक्व मनूतय्गु न्ह्यःने जिं नवानागु खँ छं नं मेपिं स्यनेकने याये फुपिं विश्वास याये बहःपिन्त स्यना ब्यु।

३ ख्रीष्ट येशूयाम्ह भिंम्ह सिपाइँ जुयाः छं नं जि नाप दुःखकष्ट फ। ४ सुं नं सिपाइँ मेमेगु ज्याय् तक्कनाच्वनी मखु, बरु थः सेनापतियात लय्-ताय्केत जक स्वयाच्वनी। ५ नियमय् च्वनाः म्हेतीम्ह मनुखं जक सिरपाः काये फइ। ६ हिचःति हाय्काः बुंज्या याइम्हय्सिनं हे दकलय् न्हापालाक लये खनी। ७ जिं धयागु खँ थुइकेगु कुतः या, छाय्धाःसा प्रभुं हे छन्त थुइके फय्कादी।

८ दाऊदया सन्तान, सिनाः म्वाना वःम्ह येशू ख्रीष्टयात लुमंकि। जिं

न्यंकागु भिंगु खँ थ्व हे खः। ६थ्व हे भिंगु खँ न्यंकाः जिं थथे अपराधी-यात थें नेवलं चिकाः च्वने माल। तर परमेश्वरयागु वचनयात सुनानं चिना तये फइ मखु। १०अय्जूगुलिं परमेश्वरं ल्यया तःपिं मनूतय्गु निंतिं जिं न्ह्यागुं सह याये फु। अले इपिं ख्रीष्ट येसूं बियादीगु सदां दइगु मुक्ति कयाः तःधने फये मा।

११थथे धयातःगु धात्थें खः —

“वय्कः नाप सीसा

वय्कः नाप हे म्वाये दइ।

१२भीसं सह याना च्वंसा

वय्कः नाप राज्य याये खनी।

भीसं वय्कःयात त्वःतूसा

वय्कलं नं भीत त्वःतादी।\* ”

१३भीपिं विश्वासी मजूसां

वय्कः विश्वासी हे जुयाच्वनी,

छाय्धाःसा वय्कलं थःम्हं

थःत विश्वास यायेगु त्वःते फइ

मखु।”

परमेश्वरपाखें ल्यःम्ह ज्याकःमि

१४परमेश्वरया नामय् इमित थ्व खँय् ख्याच्वः ब्यु। म्वाः मदुगु खँय् ल्वाना जुइ मते, थुकिं इमित हे स्यंकी।

१५परमेश्वरयागु सत्य वचनयात

खःकथं छयलेगु या। ज्या यायेत लज्या चाये म्वाः। अले परमेश्वरया विश्वास याये बहःम्ह मनू जुइत कुतः या। १६म्वाः मदुगु खँय् सुं नाप हाः जुइ मते, छाय्धाःसा थथे हाला जुइपिं मनूत परमेश्वर नाप भन भन तापाना वनी। १७इमिसं स्यनिगु खँ ध्वगिनाः नवइगु घाःथें न्यना वनी। थुपिं मध्ये हुमेनियस व फिलेतस नं खः। १८इपिं सत्ययागु लँपुं चिला वने धुंकल। इमिसं सीपिं न्हापा हे म्वाना वये धुंकल, आः म्वाना वइ मखुत धकाः न्यंका जुयाः गुलिखय् विश्वासीतय्त स्यंका बी धुंकल।

१९अय्न् परमेश्वरं स्वनादीगु जग गुबलें दुनावनी मखु। अले थ्व जगय् थथे च्वयातःगु दु — “प्रभुया मनूयात प्रभुं म्हस्यू।” अले “प्रभुयागु नां कया जूपिन्सं मभिंगु ज्या याये मज्यू।” \*

२०ततःधंपिनिगु छँय् लुं, वहःयागु थलबल जक मखु, चायागु व सिंयागु थलबल नं दयाच्वनी। गुगुं थलबल भ्वय्बलय् जक छयली, गुगुं थलबल मेबलय् छयली। २१अय्जूगुलिं सुनां थःत थज्याःगु मभिंगु ज्याखं तापाक तया तइ, व मनू तःजिगु थलबल थें जुइ। वं थःम्हं थःत शुद्ध यानाः थः

मालिकयागु ज्याय् न्ह्याबलें न्ह्यचिला चवने फइ।

२२ ल्याय्म्ह इलय् मभिंगु मतिइ वइ, उकिं थज्याःगुलिं तापाक च्वँ। बरु यचुगु नुगलं प्रभुयात मानय् याइ-पिलिसे जुयाः धर्मी जुइगु, विश्वास यायेगु, माया यायेगु व मिलय्चलय् जुया चवनेगु या।

२३ म्वाः मदुगु व थःमहं मस्यूगु खँय् जवाःसवाः याना जुइ मते। थुकिं ल्वापु जक पिहां वइ धकाः ला छं सि हे स्यू। २४ प्रभुया च्यः जुयाः सुं नाप ल्वाः जुइ मज्यू, बरु फुक्कसितं माया याइम्ह, बांलाक स्यनेकने याये फुम्ह, न्ह्यागु खं सह याये फुम्ह, २५ अले शत्रुयात नं क्वमिलु जुयाः थुइका बीम्ह जुइ माः। सके परमेश्वरं इमिगु नुगः हे हिलाः सत्य खँयात थुइके फयेकादी ला? २६ थुकथं वाः चायेकाः इपिं शैतानयागु ल्हातं बिस्सुं वये फइ, छाय्धाःसा शैतानं इमित च्यः यानातःगु दु।

### संसार फुनावनिगुया छुमां

३ १ संसार फुना वनिगु इलय् तसकं दुःख जुइ धकाः सीका ति। २ अबलय्पापिं मनूत थःत जक भिंका जुइपिं, धिबायागु लोभ याना

जुइपिं, तःधंछुया जुइपिं, घमण्ड याना जुइपिं, कर्पिन्त क्वह्यंका जुइपिं, मां-बौयागु खँ मन्यनीपिं, गुन मस्यूपिं, परमेश्वरयात वास्ता मयाःपिं, ३ दया माया याये मसःपिं, क्षमा याइ मखुपिं, मेपिन्त मभिंकाः खँ ल्हाः जुइपिं, थःत कःघाये मफुपिं, नुगः छाःपिं, भिंगु खँ मयय्कीपिं, ४ मुले तयाः गः कीपिं, थः यःथें सना जुइपिं, जि हे खः धया जुइपिं, परमेश्वर म्वाःपिं, मोजमज्जा जक याये दःसा गाःपिं, ५ पिनें परमेश्वरयात मानय् याना जुइपिं, दुनुगलं धाःसा वय्कःयागु शक्तियात मानय् मयाइपिं जुइ। थुपिं लिसे जुइ मते।

६ इपिं मध्ये गुलिसिनं ला छँय् छँय् वनाः पापं जाःपिं व पापयागु खँ मतिइ तया जुइपिं मिसातय्त ल्हातय् काइ। ७ थ्व मिसातय्सं स्यनाः सय्का कायेत यक्व स्वइ। अय् नं सत्य छु खः धकाः गुब्सं सीके फइ मखु। ८ यान्नेस व याम्ब्रेसं मोशयात मभिंका जू थें इमिसं नं सत्य खँयात मभिंका जुइ। इमिगु बुद्धि स्यने धुंकल, अले इमिके विश्वास हे मदये धुंकल।\* ९ इपिं ताः चवनी मखु, छाय्धाःसा यान्नेस व याम्ब्रेसयागु थें इमिगु मूर्ख ज्या नं मनूतय्सं सीकी।

## पावलं तिमोथीयात न्वाःगु

१० छं जिं स्यनेकने यानागु, जिगु चालचलन, जिगु लक्ष्य, जिगु विश्वास, जिं गथे सह याना च्वना, जिं गुलि माया याना च्वना, ११ जितः गुलि दुःखकष्ट बिल, जिं गुलि सास्ति नये माल, एन्टिओखियाय्, आइकोनियनय् अले लुस्त्राय् जितः छु छु जुल धयागु फुककं छं स्यू। गज्याः गज्याःगु दुःखकष्ट जिं फये माल अले प्रभुं फुकक दुःखकष्टं जितः बचय् याना तथादिल।\* १२ स्त्रीष्ट येशूयात मानय् यानाः वय्कलं धाःथें च्वनिपिन्त ला थथे दुःखकष्ट जू हे वइ। १३ मभिपिं व थकाहाः मनूतय्सं कर्पिन्त थगय् यायां थःत हे थगय् याका च्वने माली। अले थुपिं भन भन स्यना वनी।

१४ छं जक थव खँ सुया पाखें स्यना कयागु खः, व सीकाः थःमहं सय्कागु व विश्वास यानागु खँय् जुया चवँ। १५ मचानिसें हे छं धर्मशास्त्रयागु खँ सीकातःगु दु। थुकिं हे छन्त स्त्रीष्ट येशूयात विश्वास यानाः दइगु मुक्तियागु खँ थुइके फय्का बी। १६ परमेश्वरं बियादीगु धर्मशास्त्रयागु फुकक खं स्यनेकने

यायेत, न्वायेत, द्वंगु भिकेत व खः कथं म्वायेत तिबः बी। १७ परमेश्वरया मनूतय्सं न्ह्याथें ज्याःगु भिंगु ज्याखँ नं याये फये मा धकाः धर्मशास्त्र बियातःगु खः।

## भिंगु खँ न्यंकेगु

४ १ सी धुकूपिं व म्वाना च्वपिं फुककसितं न्याय यानादीमह स्त्रीष्ट येशू व परमेश्वरया नामं जिं छन्त धयाच्वना — वय्कलं हानं भायाः राज्य यानादी तिनगुलिं २ परमेश्वरयागु वचन न्यंकि। भिंगु इलय् नं मभिगु इलय् नं न्यंकि, न्ह्यागु जूसां सह यानाः मनूतय्त इमिगु दोष क्यनाः स्यनेकने या, ब्वः ब्यु, अले साहस नं ब्यु।

३ भिंगु खँ धाल धाःसा सह हे मयाइगु ई नं वइतिनि। इमिसं थःमहं मनं तुं थें ज्याःगु खँ स्यनेकने याइपिं गुरु तइ, अले थःत यःयःगु जक खँ न्यना च्वनी। ४ इमिसं सत्य खँ न्यनी मखु। मनय् वःथें कनीगु बाखं जक न्यने यय्की।

५ छं जक न्ह्यागु जूसां नुगः क्वात्तुकाः चवँ। दुःख सी माःसां स्यू। भिंगु खँ न्यंकेगु याना चवँ। थःत बियातःगु ज्या पूर्वकि।

६छाय्धाःसा जिं ला थःत हे पाये धुन। जिगु ला सीगु ई नं वये धुंकल। ७जिं यायेमाःगु बांलाक याये धुन। जिं ब्वाय् वने गाके धुन। अथेसां जिं जिगु विश्वासयात बल्लाक तया तयागु दु। ८आः ला धर्मी ठहरय् जूपिन्त धकाः तयातःगु श्रीपेच जक काये ल्यंदनि, गुगु सुयागु रूवाः मस्वसे न्याय यानादीमह प्रभुं भायाः पुइकादी। जितः जक मखु, वय्कः भाइगु यःपिं फुक्कसितं वय्कलं व श्रीपेच पुइकादी।

९छं याकनं हे जिथाय् वयेगु स्व। १०डेमास थ्व संसारयात माया यानाः जितः त्वःताः थेसलोनिक्काय् वने धुंकल। क्रेसेन्स गलातियाय् वन, तीतस दलमातियाय् वन।\* ११लूका जक जि नाप दु। मर्कूसयात मालाः छ नापं ब्वना हजि। वं जिगु ज्याय् यक्व हे ग्वाहालि बी।\* १२तुखिकसयात जिं एफिससय् छ्वयागु दु।\* १३त्रोआसय् च्वंमह कार्पसयाथाय् जिं त्वःता थकागु गा ज्वना वा। अन त्वःता थकागु सफू व छेंगुलिइ च्वयातःगु सफू नं लुमंक ज्वनाः वा।\*

१४अलेक्जेन्डर सिजःकःमिनं जितः तसकं बांमलाकल। प्रभुं वयात याये माःगु यानादी।\* १५व खनाः छं नं होश याना च्वं, छाय्धाःसा वं भीगु भिंगु खँयात तसकं मभिकाः खँ ल्हानाच्वंगु दु।

१६दकलय् न्हापां जिगु मुद्दा जूबलय् जिगु पं लिनाः सुनानं नमवाः। फुक्कसिनं जितः त्वःतल। इमिसं थुकियागु ल्याःचाः प्रभुयात बी म्वाःले मा। १७उबलय् प्रभुं हे जि नाप भायाः जितः बांलाक भिंगु खँ न्यंकेत शक्ति बियादिल। अय्जूगुलिं जिं यहूदीमखुपिन्त भिंगु खँ न्यंके फत। थुकथं वय्कलं जितः सिंहयागु म्हुतुं बचय् यानादिल। १८प्रभुं हे जितः फुक्क कथंया मभिंगु खं बचय् यानादी। अले थःगु स्वर्गयागु राज्यय् यंकेत वय्कलं जितः बचय् यानादी। वय्कः सदां सदां तःधना च्वने मा। आमेन।

### लिपांगु ज्वजलपा

१६प्रिस्किला व अकिलास, अले ओनेसिफरसया जहानपिं सकसितं

४:१० कल ४:१४; फिले २४; २ कोर ८:२३; गला २:३; तीत १:४

४:११ कल ४:१४; फिले २४; प्रे १२:१२, २५; १३:१३; १५:३७-३९; कल ४:१०

४:१२ प्रे २०:४; एफि ६:२१-२२; कल ४:७-८ ४:१३ प्रे २०:६

४:१४ १ तिमो १:२०; भज ६:२:१२; रोम २:६

जिगु ज्वजलपा धया ब्यु।\*  
 २० इरास्तस कोरिन्थ्युं तुं च्वन,  
 त्रोफिमसयात धाःसा उसाँय् मदुगुलिं  
 मिलेटस्युं तुं त्वःता थका।\*  
 २१ चिकुला न्ह्यः हे जिथाय् वयेगु

कुतः या। युबुलस, पुडेस, लिनस,  
 क्लौडिया व थन च्वपिं किजापिं  
 सकसिनं ज्वजलपा धया हःगु दु।  
 २२ प्रभु छंगु नुगल्युं दीमा। परमेश्वरं  
 छन्त दया माया यानादी मा।